

Chong Mahu Majlis Mesyuarat Ditangguhkan, Bincang Tuduhan Rasuah Taib
mStar Online
Oktober 12, 2011
Oleh SUSAN ALBERT KASSIM

KUALA LUMPUR: Ahli Parlimen Bandar Kuching, Chong Chieng Jen pada Rabu menfailkan notis di bawah Peraturan Mesyuarat 18 untuk menangguhkan Majlis Mesyuarat bagi membincangkan penyiasatan kerajaan negara asing atas tuduhan rasuah membabitkan Ketua Menteri Sarawak, Tan Sri Abdul Taib Mahmud.

Menurut Chong, notis itu dihantar kepada Yang di-Pertua Dewan Rakyat sebelum pukul 10 pagi tadi dan keputusannya akan diketahui selepas sesi soal jawab di Parlimen pada Khamis.

"Ini adalah kali pertama seorang Ketua Menteri negeri dari Malaysia menjadi subjek siasatan kerajaan negara lain atas tuduhan rasuah.

"Tindakan itu telah mencemarkan nama baik negara dan menjejaskan sistem pentadbiran kerajaan kita,"katanya pada sidang media di lobi Parlimen pada Rabu.

Sehubungan itu, beliau mahu Dewan Rakyat mempertimbangkan notis penangguhan tersebut bagi membincangkan penyiasatan itu.

Pada 13 Mei lalu, laporan Asia Sentinel bertajuk 'Swiss Bank Power to Probe Taib Holding' menyatakan Presiden Swiss mengarahkan agensinya menyiasat aset Ketua Menteri Sarawak itu di beberapa buah bank negara tersebut.

Hakcipta Terpelihara © 1995-2011 Star Publications (Malaysia) Bhd

Source:

http://mstar.com.my/berita/cerita.asp?file=/2011/10/12/mstar_berita/20111012145746&sec=mstar_berita